

■ PREMI LETERARI

Glemone îr, vuei e doman

Il Comun di Glemone al bandîs la XVIII edizion dal concors par assegnâ il premi leterari in lenghe furlane "Glemone îr, vuei e doman", a teme libar.

Il concors si compon di trê sezions: la prime dedicate a un lavôr di narrative pai fruts in lenghe furlane; la seconde par un lavôr di didatiche dal insegnament in lenghe furlane tes scuelis de infanzie, primariis o secundariis di prin grât; la tierce, riservade ai fruts des scuelis primariis o secundariis di prin grât, par un test in lenghe furlane.

I scrîts a varan di jessi par furlan, inte grafie uficiâl. I lavôrs a varan di rivâ a cheste direzion: "Concors Glemone îr, vuei e doman", Comun di Glemone, dentri di misdî di vinars ai 24 di Otubar dal 2014.

Par altris informazions, i interessâts a puedin indreçâsi al Urp sorecomunâl pe lenghe furlane de Assoçiazion intercomunâl dal Glemonàs in orari di ufici (tel. 0432/973239-34).

SCOLTADIS DI DRIUS**Masse curt**

"No tu ti rindis cont di trop curt ch'a l'è un mès fintremai che no rive le bolète de lûs.



La Region e à di pôc fat bon il regolament relatîf ae prove di certificazion linguistichis, predisponût de Agjenzie regionâl pe lenghe furlane che a proviodarà a fâ lis provis relativis.

» DI CHRISTIAN ROMANINI



Cognossince garantide

‘P’atentin’ o ‘prove di certificazion linguistichis’ te sostance la cuistion no cambie: la Region e à di pôc fat bon il regolament relatîf previodût dal articol 7 del leç 29 dal 2007, ‘Normis pe tutele, valorizazion e promozion de lenghe furlane.’

Il document al è stât predisponût de Agjenzie regionâl pe lenghe furlane (www.arlef.it) su la fonde dai criteris dal Cuadri comun european di riferiment pes lenghis (Qcer), adotât dal Consei di Europe tal 2001. I certificâts di cognossince a saran 4: A, B, C1 e C2. Chest imprest al devente

fondamentâl par determinadis professions tant che insegnants, dipendents de publiche amministrazion e operadôrs di informazion. In cheste prime fase di aplicazion, l’ent che al proviodarà a fâ lis provis relativis e sarà l’Arlef e par chest o vin domandât al President **Lorenzo Fabbro** cualchi sclariment.

- Cumò che il regolament al è aprovât, cuâl saraial il prin pas di fâ?

“O varin prime di dut di selezionâ, midiant di un cors-concors, almancul un 10 personis che a podaran cjapâ il nivel C2.

Chest al coventarà par costitûi lis primis comissions di certificazion. Al va po ricuardât che la leç e proviôt – come che al è just – un sisteme di certificazion viert, ven a stâi che no sarà dome la Arlef a dâ la certificazion, ma a podaran fâlu ancje altris sogjets cualificâts, su propueste e sot il control de Agjenzie. Tal imprin, dut câs, la certificazion e sarà dade dome de Arlef, par permeti di inviâ il sisteme fintremai che no saran avonde sogjets in stât di costitûi lis comissions di certificazion”.

- Ce cambial pal insegnament dal furlan a scuele?

“Al cambie une vore, o disarès. Fin cumò si è iscritte ae liste dai insegnants di furlan ancje int cuntune scjarse cognossince de lenghe. Cu la certificazion chest nol podarà plui sucedi. Ta chest mût si podarà valorizâ lis tantis professionalitâts veris che a son, e tal stes timp garantî che i nestris fruts a vedin int preparade in catedre. Dut câs al sarà un percors graduâl e compagnât di une ativitât di formazion. O contin par chest che la Universitât dal Friûl e fasi la sô part”.

- E se cualchidun al acusàs che chest al è discriminatori?

“No lu è parcè che ducj a podin domandâ di certificâsi, come che al sucêt in cualsisei altre lenghe”.

- Esistono altris câs in Italie e in Europe?

“Se o fevelin di minorancis, in Italie o vin il câs del Trentin-SudTiròl. Ma come che o ai dit la certificazion e je previodude par dutis lis lenghis. Chest, par tant, al è un pas necessari par fâ dal furlan une lenghe plui normâl”.



ilfriuli@ilfriuli.it

Euronews informa

Âfs muartis par colpe dai velens butâts te blave

Letare dal assessôr Barberio al Ministeri de Salût, “Fuarte preocupazion pai produtôrs e pal ecosisteme naturâl”

Âfs muartis in gran part de provincie di Udin par colpe dai velens butâts te blave. La murie di âfs registrade intes setemanis passadis e interesse plui che altri la zone dal Friûl centrâl e culinâr, ma segnalazions a rivin ancje di produtôrs di Glemone, Tierç e Cividât. A son une trentine i apicultôrs che a ripuartin une fuarte diminuzion des âfs intai lôr implants produtîfs. Chest fat si è difondût sul teritori e la Provincie di Udin, a mieç dal assessôr ae agriculture Leonardo Barberio, che al à cjapât in man il monitorament fat dal Consorzi dai Apicultôrs di Udin, e mostre une fuarte preocupazion e denuncie la situazion di pericol: oltri a prejudicâ la ativitât e la pro-

duzion dai apicultôrs, di fat, la murie des âfs e rapresente un risclî grâf par dut l’ecosisteme naturâl. La scjarse ativitât di impolinazion des âfs e met a repentai la riproduzion des plantis cun consequencis su dut il compart agricul, e duncje alimentâr.

La prime cause de murie des âfs e semee jessi la utilizazion, pal tratament de blave, di un inseticide a base di neonicotinoide thiacloprid vietât fin al an passât e autorizât tal 2014 dal Ministeri de Salût cun cualchi modifiche. La murie e je stade aciertade a pôcs dîs de semine de blave in cjamps che si cjatin dongje di boçs di âfs e e je localizade di plui intes areis cun coltivazion intensive di blave. Un contat



lizêr cun cheste sostance al è letâl pes âfs. Su la vere cause no si sa ancjemò nuie di sigûr: al moment dutis lis ipotesis a vegnin valutadis, ancje se il fat al interesse ancje altris zonis de Italie dal Nord e al semee che e sedi une origine comune. Cualchi produtôr furlan colpît si è inacuart de murie propit in chescj dîs, cul inizi des primis operazions di racuelte de mil. La produzion, che e varès vût di jessi

buine ancje par vie des condizions metereologichis favorevulis e des floriduris, si è presentade inveizit mancul consistente dal previodût propit par cheste murie di âfs.

L’assessôr Barberio al à domandât al Consorzi dai Apicultôrs di Udin un inzornament costant de situazion, e di chest grâf probleme al à informât ancje il Ministeri de Salût. In riferiment a chest fat Barberio si rimet ae Region Fvg, che e à ricevût la stesse documentazion, par che e cjapi in considerazion la pussibilitât di adotâ specificis misuris a supuart dai apicultôrs, viodudis lis ricjadudis negativis su la produzion in cheste prime part dal an. Sui implants interessâts de murie a son stâts fats riliefs uficiâi di bande des Aziendis sanitariis e campionaments dal Servizi Sos Spia (Scuadre di Pront intervent des âfs), che al fâs part dal proget Beenet.